

Script of Morning Dogri (NSD) Bulletin 06-09-2026

आकाशवाणी

1. प्रधानमंत्री नरेंद्र मोदी होरें दिल्ली युनिवर्सिटी दे श्रीराम कॉलेज ऑफ कॉमर्स दे शताब्दी समारोह गी संबोधित कीता - नौजवानें गी बड्डे सुखने दिखने ते ऐसी संस्थाएं दे निर्माण दी अपील कीती ऐ जेहिडयां आलमी स्तर दिआं होन।
2. भारतीय जनता पार्टी दे राज्यसभा सांसद डॉ. दिनेश शर्मा होरेंगी अंडमान ते निकोबार द्वीपसमूह दा उप-राज्यपाल नियुक्त कीता गेआ ऐ।
3. छत्तीसगढ़ च एन.आई.ए. दी बशेष अदालतै झीरम घाटी च होए दे माओवादी हमले दे मामले च सबनें 10एं आरोपियें गी दोषी करार देई दित्ता ऐ।
4. नमीं दिल्ली च इस म्हीने दी 12 ते 13 तरीक गी आईब्रिक्स शिखर सम्मेलन च 500 शा मते संस्थागत निवेशक, वित्त मंत्री ते उद्योगपति शामिल होडन।
5. महिलाएं दे टी20 एशिया कप दे मुकाबले च कल भारत ने पाकिस्तान गी 7 विकेटें कन्नै हराई दित्ता।

<><><><><><>

PM-SRCC Address

प्रधानमंत्री नरेंद्र मोदी होरें नौजवानें गी बड्डे सुखने दिखने ते लेखा, वित्त, कनून ते सलाह-मशवरे कन्नै जुडी दी ऐसी संस्थाएं दे निर्माण दी अपील कीती ऐ जेहिडियां आलमी स्तर दिआं होन। कल दिल्ली युनिवर्सिटी दे श्रीराम कॉलेज ऑफ कॉमर्स दे शताब्दी समारोह च उ'नें आखेआ जे अज्ज भारती मूल दे केई लोक दुनिया दी अब्बल दर्जे दी कंपनिएं दी अगुवाई करा'रदे न ते भारतीयें आसेआ बनाई गेदी कंपनियां बी दुनिया दी अगुवाई करी सकदिआं न। श्री मोदी होरें आखेआ जे आलमी सतह उप्पर बनी दी यक्कोतक्की दे दरम्यान बी भारत दी तिमाही विकास दर 7 इशारिया 8 फीसद रेह्णी ऐ जेह्डी साठे देसै दी आर्थिक समर्थ गी दर्शांदी ऐ। उ'नें आखेआ जे भारत ने नीतिगत मामलें च गतिरोध थमां लेइयै गतिशीलता तगर दा लम्मा पैंडा तय कीता ऐ ते दुनिया दिक्खा करदी ऐ जे भारत सबनें शा तेजी कन्नै आर्थिक तरक्की करा'रदा मुल्ख ऐ। प्रधानमंत्री होरें आखेआ जे आतंकवाद गी हराई दित्ता गेदा ऐ, आत्मविश्वास कन्नै भरोचे दे सशस्त्र बल दुश्मनें दे घरे तगर हमला करा'रदे न ते जम्मू-कश्मीर थमां लेइयै पूर्वोत्तर तगर शांति बहाल होई गेई ऐ। प्रधानमंत्री होरें दस्सेआ जे अप्रैल थमां जून दे दरम्यान बिजली दी पैदावार च 9 फीसद दा बाद्दा होआ ऐ। उ'नें आखेआ जे इस दरान गड्डिएं दी बिक्री 20 फीसद कोला मती बधी ऐ जेह्दी मुख्क वजह दोपहिया वाहनें च 20 फीसद ते त्रैपहिया गड्डिएं च तकरीबन 30 फीसद दा बाद्दा हा। श्री मोदी होरें आखेआ जे फौलाद ते सीमेंट दी खपत च 8 फीसदा दा बाद्दा निर्माण, आवास ते कारोबारी कम्में च तेजी दे चलदे होआ ऐ। उ'नें इब्बी दस्सेआ जे स्मार्टफोन दा निर्यात हुन 25 लक्ख करोड़ रुपें शा मते दा ऐ ते घरेलू रक्षा उत्पादन तकरीबन 2 लक्ख करोड़ रुपें दे अजे धोड़ी दे सबनें शा उच्चे स्तर पर पुज्जी गेआ ऐ। श्री मोदी होरें आखेआ जे 140 करोड़ भारतवासी मिलियै भारत गी विकसित ते आत्मनिर्भर बनाडन। इस मौके पर शिक्षा मंत्री प्रह्लाद जोशी होरें आखेआ जे प्रधानमंत्री मोदी हुंदे काबल नेतृत्व च भारत मजूदा समें च दुनिया दा त्रीया सबनें शा बड्डा

स्टार्ट-अप तंत्र ऐ। उनें आखेआ जे आलमी सतह दे बजारें च कौशल रूप कन्नै सक्षम लोकें दी लोड ऐ ते एह युवाएं लेई इक बड़ा बधिया मौका ऐ।

<><><><><><>

Andaman-LG

भारतीय जनता पार्टी दे राज्यसभा सांसद डॉ. दिनेश शर्मा होरें'गी अंडमान ते निकोबार द्वीपसमूह दा उप-राज्यपाल नियुक्त कीता गेआ ऐ। ओह अवकाश-हासल एडमिरल देवेंद्र कुमार जोशी हुं'दी थाह लैडन। श्री जोशी होरें 8 अक्तूबर, 2017 गी अंडमान ते निकोबार द्वीप समूह दे उप-राज्यपाल दा औहद्धा सांभेआ हा। 62एं बरें दे डॉ. शर्मा, उत्तरप्रदेश दे उप-मुख्यमंत्री रेहूी चुके दे न। उं'दा राज्यसभा कार्यकाल 25 नवंबर गी खत्म होना हा। राष्ट्रपति भवन आसेआ जारी इक विज्ञप्ति च आखेआ गेआ ऐ जे डॉ. शर्मा हुं'दी नियुक्ति उं'दे आसेआ एह औहद्धा सांभने दी तरीक थमां गै लागू मन्नी जाहगा।

<><><><><><>

Chhatisgarh-NIA

छत्तीसगढ़ दे जगदलपुर च राष्ट्री जांच एजेंसी-एन.आई.ए. दी बशेष अदालतै ने झीरम घाटी च होए दे माओवादी हमले दे मामले च सबनें 10एं आरोपियें गी दोषी करार देई दित्ता ऐ। इस मामले च कुल 11 आरोपी हे जिं'दे चा इक जने दी मौत होई गई ही।

उं महिलाएं सने सबनें 10एं आरोपियें गी 29 लोकें दी हत्तेआ ते 15एं जनें दी हत्या दी कोशश करने दा दोषी करार दित्ता ऐ। इं'दी सजा बारै फैसला 16 सितंबर गी होगा।

ध्यानजोग ऐ जे इ'नें माओवादिएं मई-2013 च झीरम घाटी च कांग्रेस दे नेताएं दे काफिले पर हमला कीता हा। इ'दे च कांग्रेस पार्टी दे वरिष्ठ नेताएं सने कुल 29 लोक मारे गे हे।

<><><><><><>

Shah Goa Visit

गृह मंत्री अमित शाह होर अज्ज गोवा च पच्छमी क्षेत्रीय परिषद दी 28मीं बैठक दी अध्यक्षता करडन। ओहू गृह मंत्रालय दी इक बैठक दी अध्यक्षता बी करडन ते पत्रकारें गी संबोधित करडन। श्री शाह होर भारती जनता पार्टी दे नमें रियासती दफ्तर दा उद्घाटन बी करडन। शाह होर 3 दिनें दे दौरे लेई कल गोवा पुज्जे हे।

<><><><><><>

NEET-PG- 2026

नेशनल बोर्ड ऑफ एग्जामिनेशन इन मेडिकल साइंसेज (NBEMS) नै राजस्थान दी राजधानी जयपुर दे सीतापुरा च Aion Digital Zone दे स्टेहान केन्द्र पर NEET-PG दे परतियै स्टेहान गी कामयाबी कन्नै सम्पन्न कीता ऐ। सेहत ते परिवार कल्याण मंत्रालय मुजब, जयपुर च पंज केन्द्रें पर स्टेहान बवस्थित तरीके कन्नै लैता गेआ। पिछले म्हीने 30 तरीक गी जयपुर दे स्टेहान केन्द्रें पर बिजली दी सप्लाई बंद होने कारण 2 हजार 445 मेदवारें दे स्टेहान पूरे नेई होई सके हे।

<><><><><><>

BRICS Summit

नमीं दिल्ली च इस म्हीने दी 12 ते 13 तरीक गी आईब्रिक्स शिखर सम्मेलन च 500 शा मते संस्थागत निवेशक, वित्त मंत्री ते उद्योगपति शामिल होडन। एह आयोजन ब्रिक्स शिखर सम्मेलन दे बक्ख-बाहें आयोजित होग। सम्मेलन दा मकसद ब्रिक्स दे 21 सदस्य मुखें दे सांझेदार मुखें च संप्रभु पूंजी दा इस्तेमाल भरोसेमंद बुनियादी ढांचे, ऊर्जा ते डिजिटल समर्थ आहली परियोजनाएं आस्तै करना ऐ। सम्मेलन च बन्ने-पार रास-पूंजी लाने, गैर-डॉलर निपटान ते भुगतान प्रणालियों पर चर्चा होग। एहदे अलावा, भारत दी यूपीआई भुगतान प्रणाली ते ब्राजील दी पिक्स भुगतान प्रणालियों गी जोडने ते डिजिटल करंसिएं च कारोबार पर बी चर्चा दी मेद ऐ। एह शिखर सम्मेलन नेहू समें होआ करदा ऐ जिसलै ब्रिक्स मुख, बपार गतिशीलता, अमरीकी शुल्क दे दबाऽ ते उच्च डॉलर लागत दे हल आस्तै अपने आपै गी तैयार करा'रदे न। भारत दी अध्यक्षता च 18मां ब्रिक्स शिखर सम्मेलन 12 ते 13 सितंबर गी नमीं दिल्ली दे भारत मंडपम च आयोजित होग। शिखर सम्मेलन च सद्दे गेदे परौहने बी एहदे च हिस्सा लैडन।

<><><><><><>

US-IranAttacks

ईरान दी नौसेना ने होर्मुज जलडमरूमध्य थमां लंग्घा करदे तेल दे 3 टैंकरें ते अमरीका कन्नै जुडे दे 3 ज्हाजें पर हमले दा दावा बन्नेआ ऐ। एहदे शा पैहले, अमरीका ने फारस दी खाड़ी ते ओमान सागर च ईरान दे 3 तेल टैंकरें पर हमला कीता हा। ईरानी नौसेना दे मताबक, अमरीकी हमलें करी ज्हाजें गी नुकसान पुज्जा ऐ ते एहू होर्मुज जलडमरूमध्य गी बंद करने दी कोशश ऐ। तोआई अमरीका दी केंद्रीय कमान-सेंटकॉम ने आखेआ ऐ जे ईरानी कच्चे तेल दे टैंकर अरबें डॉलर दे गुप्त नेटवर्क दा हिस्सा हे। ईरान दे बदेश मंत्रालय ने चेतावनी दिती ऐ जे अमरीकी हमलें दे नतीजे अमरीका ते ओहदे सैह्योगियें गी भुगतने होडन।

<><><><><><>

US Russia Ukraine

रूस दे राष्ट्रपति व्लादिमीर पुतिन होरें कल अमरीकी दूत स्टीव विटकाँफ ते जेरेड कुशनर हुं दे'नै मलाटी कीती। एहू मलाटी रूस-यूक्रेन संघर्ष खत्म करने दे सरबंधे च ही। एहू बैठक नेहू समें पर होई ऐ जिसलै रूस ते यूक्रेन बश्कार ब्हाई हमले जारी न। श्री पुतिन होरें गल्लबात दे दरान यूक्रेन पर रूसी हमले त्रै दिनें लेई रोकने दा हुक्म दित्ता। परते च, यूक्रेन दे राष्ट्रपति वोलोदिमिर जेलेंस्की होरें आखेआ जे यूक्रेन बी सोमवार धोड़ी रूस पर हमले रोकने गी तैयार ऐ। अमरीकी दूत अज्ज यूक्रेन दी राजधानी कीव दा दौरा करडन।

<><><><><><>

Women's Cricket

महिला क्रिकेट च भारत नै कल दुबई च टी-20 एशिया कप दे ग्रुप-ए दे मैच च पाकिस्तान गी हराई दित्ता। पाकिस्तान पैहले बल्लेबाजी करदे होई 18 ओवर ते 1 गेंद च छडे 55 रन्ज बनाइयै आउट होई गेआ। टी-20 च एहू ओहदा अजें तगर दा सब्मनें शा घट्ट स्कोर ऐ। भारत नै 8एं ओवरें ते 4 गेंदें च इस लक्ष्य गी हासल करी लैता। भारत दी तरफा स्पिनर गेंदबाज श्रीचरणी ते प्रेमा रावत नै त्रै-त्रै विकेटां, जिसलै के दीप्ति शर्मा नै दौं विकेटां लैतियां। कप्तान दे तौर उप्पर हरमनप्रीत कौर हुं'दा एहू 150मां टी-20 मैच हा। मर्दे जां महिलाएं दे क्रिकेट च एहू उपलब्धि हासल करने आहली ओहू पैहली कप्तान न।

<><><><><><>

Badminton

बैडमिंटन च, भारत दे सात्विक साईराज रंकीरेड्डी ते चिराग शेट्टी त्रीऽ बारी चाइना मास्टर्स दे फाइनल च पुज्जी गे न। फाइनल च उं'दा मुकाबला अज्ज चीन दे हे जी टिंग ते रेन जियांग यू दी जोड़ी कन्नै होग। सात्विक ते चिराग दी जोड़ी ने सेमीफाइनल च मलेशिया दे नूर मोहम्मद अयूब ते टैन वी किओंग गी शिकस्त दिक्ती ही।

<><><><><><>

Weather

मौसम विभाग ने अज्ज बिहार, पूर्वी राजस्थान, हरियाणा, चंडीगढ़, दिल्ली, मध्यप्रदेश, उत्तरप्रदेश, उत्तराखंड ते उत्तर-पूर्वी राज्यें दे किश हिस्सें च भारी बरखा दी भविष्यवाणी कीती ऐ। अंडमान ते निकोबार टापुएं सने बिहार, कर्नाटक दे अंदरूनी हिस्सें, जम्मू-कश्मीर, लद्दाख, मध्य प्रदेश, राजस्थान, पच्छिम बंगाल ते सिक्किम च बी अज्ज गरज-चमक दे कन्नै बरखा बरने ते तेज ब्हां चलने दे असार न। तमिलनाडु, पुडुचेरी, कराईकल ते मेघालय च बी मौसम नेहा गै रौहने दा इकमान ऐ।

<><><><><><>